

ধূমপান ও তামাকজাত দ্রব্য ব্যবহার (নিয়ন্ত্রণ) আইন, ২০০৫

সূচী

ধারাসমূহ

- ১। সংক্ষিপ্ত শিরোনামা ও প্রবর্তন
- ২। সংজ্ঞা
- ৩। অন্যান্য আইনের প্রয়োগ
- ৪। পাবলিক প্লেস এবং পাবলিক পরিবহণে ধূমপান নিষিদ্ধ
- ৫। তামাকজাত দ্রব্যের বিজ্ঞাপন নিষিদ্ধ
- ৬। অটোমেটিক ভেডিং মেশিন স্থাপন নিষিদ্ধ
- ৭। ধূমপান এলাকার ব্যবস্থা
- ৮। সতর্কতামূলক নোটিশ প্রদর্শন
- ৯। কর্তৃত্বপ্রাপ্ত কর্মকর্তার ক্ষমতা
- ১০। প্যাকেটের গায়ে স্বাস্থ্য সম্পর্কিত সতর্কবাণী ইত্যাদি
- ১১। তামাকজাত দ্রব্য আমদানির ক্ষেত্রে উপাদান সম্পর্কিত তথ্য প্রদান
- ১২। তামাকজাত দ্রব্যের বিকল্প ফসল উৎপাদনের জন্য ঋণ প্রদান
- ১৩। জনসেবক
- ১৪। অপরাধ বিচারার্থ গ্রহণ এবং জামিনযোগ্য
- ১৫। কোম্পানী কর্তৃক অপরাধ সংঘটন
- ১৬। বিধি প্রণয়নের ক্ষমতা
- ১৭। মূল পাঠ এবং ইংরেজীতে পাঠ
- ১৮। রহিতকরণ ও হেফাজত

ধূমপান ও তামাকজাত দ্রব্য ব্যবহার (নিয়ন্ত্রণ) আইন, ২০০৫

২০০৫ সনের ১১ নং আইন

[১৫ মার্চ, ২০০৫]

ধূমপান ও তামাকজাত দ্রব্যের উৎপাদন, ব্যবহার, ক্রয়-বিক্রয় ও বিজ্ঞাপন নিয়ন্ত্রণের লক্ষ্যে বিধান প্রণয়নকল্পে প্রণীত আইন।

যেহেতু ধূমপান ও তামাকজাত দ্রব্যের ব্যবহার জনস্বাস্থ্যের জন্য ক্ষতিকর;

যেহেতু বিশ্বস্বাস্থ্য সংস্থার ৫৬তম সম্মেলনে ধূমপান ও তামাকজাত দ্রব্যের ব্যবহার নিরুৎসাহিত করার জন্য Framework Convention on Tobacco Control (FCTC) নামীয় কনভেনশনে বাংলাদেশ ১৬ জুন, ২০০৩ ইং তারিখে স্বাক্ষর এবং ১০ মে, ২০০৪ ইং তারিখে অনুস্বাক্ষর করিয়াছে; এবং

যেহেতু উক্ত কনভেনশনের বিধানাবলী বাংলাদেশে কার্যকর করার লক্ষ্যে ধূমপান ও তামাকজাত দ্রব্যের উৎপাদন, ব্যবহার, ক্রয়-বিক্রয় ও বিজ্ঞাপন নিয়ন্ত্রণ করা সমীচীন ও প্রয়োজনীয়;

সেহেতু এতদ্বারা নিম্নরূপ আইন করা হইল:-

১। (১) এই আইন ধূমপান ও তামাকজাত দ্রব্য ব্যবহার (নিয়ন্ত্রণ) আইন, ২০০৫ নামে অভিহিত হইবে।

সংক্ষিপ্ত শিরোনামা ও
প্রবর্তন

(২) সরকার, সরকারী গেজেটে প্রজ্ঞাপন দ্বারা, যে তারিখ নির্ধারণ করিবে সেই তারিখে এই আইন কার্যকর হইবে:

তবে শর্ত থাকে যে, এই আইনের বিভিন্ন ধারা কার্যকর করার জন্য ভিন্ন ভিন্ন তারিখ নির্ধারণ করা যাইবে।

২। বিষয় বা প্রসংগের পরিপন্থী কোন কিছু না থাকিলে, এই আইনে-

সংজ্ঞা

(ক) “কর্তৃত্বপ্রাপ্ত কর্মকর্তা” অর্থ উপজেলা নির্বাহী কর্মকর্তা বা উপজেলা স্বাস্থ্য কর্মকর্তা বা তাঁহার সমমানের বা তদুর্ধ্ব পদমর্যাদার স্বাস্থ্য অধিদপ্তরের কোন কর্মকর্তা এবং এতদসংশ্লিষ্ট দায়িত্ব পালনের জন্য বিভিন্ন আইনের অধীন ক্ষমতাপ্রাপ্ত যে কোন বা সকল কর্মকর্তাও ইহার অন্তর্ভুক্ত হইবে;

(খ) “তামাক” অর্থ কোন নিকোটিনা টোবাকাম বা নিকোটিনা বাসটিকার উদ্ভিদ বা এতদসম্পর্কিত অন্য কোন উদ্ভিদ বা উহাদের কোন পাতা বা ফসল;

- (গ) “তামাকজাত দ্রব্য” অর্থ তামাক হইতে তৈরী যে কোন দ্রব্য, যাহা ধূমপানের মাধ্যমে শ্বাসের সহিত টানিয়া নেওয়া যায়, এবং বিড়ি, সিগারেট, চুরুট, সিগার এবং পাইপে ব্যবহার্য (মিস্সার)ও ইহার অন্তর্ভুক্ত হইবে;
- (ঘ) “ধূমপান” অর্থ কোন তামাকজাত দ্রব্যের ধোঁয়া শ্বাসের সহিত টানিয়া নেওয়া বা বাহির করা, এবং কোন প্রজ্বলিত তামাকজাত দ্রব্য ধারণ করা বা নিয়ন্ত্রণ করাও ইহার অন্তর্ভুক্ত হইবে;
- (ঙ) “ধূমপান এলাকা” অর্থ কোন পাবলিক প্লেস বা পাবলিক পরিবহণে ধূমপানের জন্য নির্দিষ্টকৃত কোন এলাকা;
- (চ) “পাবলিক প্লেস” অর্থ শিক্ষা প্রতিষ্ঠান, সরকারী, আধা-সরকারী ও স্বায়ত্তশাসিত অফিস, গ্রন্থাগার, লিফট, হাসপাতাল ও ক্লিনিক ভবন, আদালত ভবন, বিমানবন্দর ভবন, সমুদ্র বন্দর ভবন, নৌ-বন্দর ভবন, রেলওয়ে স্টেশন ভবন, বাস টার্মিনাল ভবন, ফেরি, শ্রেক্ষাগৃহ, আচ্ছাদিত প্রদর্শনী কেন্দ্র, থিয়েটার হল, বিপণী ভবন, পাবলিক টয়লেট, সরকারী বা বেসরকারীভাবে পরচালনাধীন শিশু পার্ক এবং সরকার কর্তৃক, সরকারী গেজেটে প্রজ্ঞাপন দ্বারা, নির্ধারিত অন্য যে কোন বা সকল স্থান;
- (ছ) “পাবলিক পরিবহণ” অর্থ মোটর গাড়ী, বাস, রেলগাড়ী, ট্রাম, জাহাজ, লঞ্চ, যান্ত্রিক সকল প্রকার জন-যানবাহন, উড়োজাহাজ এবং সরকার কর্তৃক, সরকারী গেজেটে প্রজ্ঞাপন দ্বারা, নির্দিষ্টকৃত বা ঘোষিত অন্য যে কোন যান;
- (জ) “বিধি” অর্থ এই আইনের অধীন প্রণীত বিধি; এবং
- (ঝ) “ব্যক্তি” অর্থ কোম্পানী, সমিতি বা সংস্থা বা ব্যক্তি সমষ্টি, সংবিধিবদ্ধ হউক বা না হউক, অন্তর্ভুক্ত হইবে।

অন্যান্য আইনের
প্রয়োগ

৩। এই আইনের বিধানাবলী, উহাতে ভিন্নরূপ কিছু না থাকিলে, the Railways, Act, 1890 (Act IX of 1890), the Juvenile Smoking Act, 1919 (Ben. Act II of 1919), the Dhaka Metropolitan Police Ordinance, 1976 (Ord. No. III of 1976), the Chittagong Metropolitan Police Ordinance, 1978 (Ord. No. XLVIII of 1978), the Khulna Metropolitan Police Ordinance, 1985 (Ord. No. LII of 1985) এবং রাজশাহী মহানগরী পুলিশ আইন, ১৯৯২ (১৯৯২ সনের ২৩ নং আইন) সহ আপাততঃ বলবৎ অন্য কোন আইন এর অতিরিক্ত, এবং উহাদের হানিকর নয়, বলিয়া গণ্য হইবে।

পাবলিক প্লেস এবং
পাবলিক পরিবহণে
ধূমপান নিষিদ্ধ

৪। (১) ধারা ৭ এর বিধান সাপেক্ষে, কোন ব্যক্তি কোন পাবলিক প্লেস এবং পাবলিক পরিবহণে ধূমপান করিতে পারিবেন না।

(২) কোন ব্যক্তি উপ-ধারা (১) এর বিধান লংঘন করিলে তিনি অনধিক পঞ্চাশ টাকা অর্থদণ্ডে দণ্ডনীয় হইবেন।

৫। (১) কোন ব্যক্তি-

তামাকজাত দ্রব্যের
বিজ্ঞাপন নিষিদ্ধ

- (ক) কোন প্রেক্ষাগৃহে বা সরকারী ও বেসরকারী রেডিও এবং টেলিভিশন চ্যানেলে তামাকজাত দ্রব্যের বিজ্ঞাপন প্রচার, আলোকচিত্র প্রদর্শন বা শ্রুতিগোচর করিবে না বা করাইবে না;
- (খ) তামাকজাত দ্রব্যের বিজ্ঞাপন রহিয়াছে এমন কোন ফিল্ম বা ভিডিও টেপ বা অনুরূপ অন্য কিছু বিক্রয় করিবে না বা করাইবে না;
- (গ) বাংলাদেশে প্রকাশিত কোন বই, ম্যাগাজিন, লিফলেট, হ্যান্ডবিল, বিলবোর্ড, খবরের কাগজ বা ছাপানো কাগজে তামাকজাত দ্রব্যের বিজ্ঞাপন মুদ্রণ বা প্রকাশ করিবে না বা করাইবে না; এবং
- (ঘ) জনগণের নিকট এমন কোন লিফলেট, হ্যান্ডবিল বা দলিল বিতরণ বা সরবরাহ করিবে না যাহাতে তামাকজাত দ্রব্যের ব্র্যান্ডের নাম, রং, লোগো, ট্রেডমার্ক, চিহ্ন, প্রতীক বা বিজ্ঞাপন রহিয়াছে।

ব্যাখ্যা।- এই ধারায় বিজ্ঞাপন অর্থ যে কোন প্রকার প্রিন্ট ও ইলেক্ট্রনিক মিডিয়া, ই-মেইল, ইন্টারনেট, টেলিকাস্ট, বা অন্যান্য মাধ্যমে লিখিত, ছাপানো বা কথিত শব্দের দ্বারা প্রচার।

(২) উপ-ধারা (১) এর দফা (ঘ) এর কোন কিছুই তামাকজাত দ্রব্য বিক্রয় করা হয় এমন কোন দোকানদার বা ব্যবসায়ীর ক্ষেত্রে প্রযোজ্য হইবে না।

(৩) তামাকজাত দ্রব্য বিক্রয়ে উৎসাহ প্রদান বা প্রলুব্ধকরণের উদ্দেশ্যে কোন ব্যক্তি উক্ত দ্রব্যের কোন নমুনা বিনামূল্যে জনগণকে প্রদান বা প্রদানের প্রস্তাব করিতে পারিবেন না।

(৪) কোন ব্যক্তি তামাকজাত দ্রব্যের ব্যবহার উৎসাহিত করার উদ্দেশ্যে কোন দান, পুরস্কার, বৃত্তি বা স্কলারশীপ প্রদান কিংবা গ্রহণ কিংবা কোন টুর্নামেন্ট আয়োজনের জন্য অন্য কোন ব্যক্তির সহিত কোন চুক্তি বা সমঝোতা করিতে পারিবেন না।

(৫) কোন ব্যক্তি এই ধারার বিধান লংঘন করিলে তিনি অনূর্ধ্ব তিনমাস বিনাপ্রশ্রম কারাদণ্ড বা অনধিক এক হাজার টাকা অর্থদণ্ড বা উভয় দণ্ডে দণ্ডনীয় হইবেন।

৬। (১) কোন ব্যক্তি জনসাধারণের চলাচলের রাস্তা, পাবলিক প্লেস বা পাবলিক পরিবহণে তামাকজাত দ্রব্য বিক্রয়ের জন্য কোন অটোমেটিক ভেডিং মেশিন স্থাপন বা স্থাপনের অনুমতি প্রদান করিতে বা রাখিতে বা রাখিবার অনুমতি প্রদান করিতে পারিবে না।

অটোমেটিক ভেডিং
মেশিন স্থাপন নিষিদ্ধ

(২) কোন ব্যক্তি উপ-ধারা (১) এর বিধান লংঘন করিলে তিনি অনধিক এক হাজার টাকা অর্থ দণ্ডে দণ্ডনীয় হইবেন।

ব্যাখ্যা।- এই ধারায় অটোমেটিক ভেডিং মেশিন অর্থ এমন স্বয়ংক্রিয় মেশিন যাহাতে কোন মুদ্রা, ধাতু বা অন্য কোন দ্রব্য সন্নিবেশ করাইয়া স্বাভাবিকভাবে বা ক্রেতার সহযোগিতায় তামাক বা তামাকজাত দ্রব্য পরিবেশন করা হয়।

ধূমপান এলাকার
ব্যবস্থা

৭। (১) কোন পাবলিক প্লেসের মালিক, তত্ত্বাবধায়ক বা নিয়ন্ত্রণকারী ব্যক্তি বা ব্যবস্থাপক উহাতে এবং কোন পাবলিক পরিবহণের মালিক, তত্ত্বাবধায়ক, নিয়ন্ত্রণকারী ব্যক্তি বা ব্যবস্থাপক উহাতে ধূমপানের জন্য স্থান চিহ্নিত বা নির্দিষ্ট করিয়া দিতে পারিবেন।

(২) কোন পাবলিক প্লেস বা পাবলিক পরিবহণে ধূমপানের স্থানের সীমানা, বর্ণনা, সরঞ্জাম এবং নিরাপত্তা ব্যবস্থা বিধি দ্বারা নির্ধারিত হইবে।

সতর্কতামূলক নোটিশ
প্রদর্শন

৮। ধারা ৭ এর অধীন ধূমপান এলাকা হিসাবে চিহ্নিত বা নির্দিষ্ট স্থানের বাহিরে প্রত্যেক পাবলিক প্লেসের মালিক, তত্ত্বাবধায়ক, নিয়ন্ত্রণকারী ব্যক্তি বা ব্যবস্থাপক উক্ত স্থানের এক বা একাধিক জায়গায় এবং পাবলিক পরিবহণের মালিক, তত্ত্বাবধায়ক, নিয়ন্ত্রণকারী ব্যক্তি বা ব্যবস্থাপক সংশ্লিষ্ট যানবাহনে “ধূমপান হইতে বিরত থাকুন, ইহা শাস্তিযোগ্য অপরাধ” সম্বলিত নোটিশ বাংলা এবং ইরেজী ভাষায় প্রদর্শন করিবার ব্যবস্থা করিবেন।

কর্তৃত্বপ্রাপ্ত কর্মকর্তার
ক্ষমতা

৯। (১) এই আইনের বিধান কার্যকর করার উদ্দেশ্যে কর্তৃত্বপ্রাপ্ত কর্মকর্তা স্ব স্ব অধিক্ষেত্রে কোন পাবলিক প্লেস ও পাবলিক পরিবহণে প্রবেশ করিয়া পরিদর্শন করিতে পারিবেন।

(২) এই আইনের বিধান লংঘন করিয়াছেন এমন কোন ব্যক্তিকে কর্তৃত্বপ্রাপ্ত কর্মকর্তা কোন পাবলিক প্লেস বা পাবলিক পরিবহণ হইতে বহিষ্কার করিতে পারিবেন।

(৩) এই আইনের বিধান লংঘন করিয়া কোন ব্যক্তি যদি কোন তামাকজাত দ্রব্য বিক্রয় করেন বা বিক্রয় করার প্রস্তাব করেন, তাহা হইলে কর্তৃত্বপ্রাপ্ত কর্মকর্তা উক্ত তামাকজাত দ্রব্য বিধি দ্বারা নির্ধারিত পদ্ধতিতে ব্যবহার, হস্তান্তর, ধ্বংস বা বাজেয়াপ্ত করিতে পারিবেন।

(৪) উপ-ধারা (৩) এর অধীন কোন কার্যক্রম গৃহীত হইলে তৎসম্পর্কে কার্যক্রম গ্রহণের ৭ দিনের মধ্যে কর্তৃত্বপ্রাপ্ত কর্মকর্তা সরকারকে লিখিতভাবে অবহিত করিবেন।

১০। (১) তামাকজাত দ্রব্য উৎপাদনকারী প্রত্যেক প্রতিষ্ঠান তামাকজাত দ্রব্যের প্যাকেট বা মোড়কে বড় অক্ষরে স্পষ্টত দৃশ্যমানভাবে ও বড়মাপে (মোট জায়গার অন্যান্য ৩০% শতাংশ পরিমাণ) নিম্নবর্ণিত যে কোন সতর্কবাণী মুদ্রণ করিবে, যথা:-

- (ক) ধূমপান মৃত্যু ঘটায়;
- (খ) ধূমপানের কারণে স্ট্রোক হয়;
- (গ) ধূমপান হৃদরোগের কারণ;
- (ঘ) ধূমপান ফুসফুস ক্যান্সারের কারণ;
- (ঙ) ধূমপানের কারণে শ্বাসপ্রশ্বাসের সমস্যা হয়; বা
- (চ) ধূমপান স্বাস্থ্যের জন্য ক্ষতিকর।

(২) উপ-ধারা(১) এর বিধান অনুসরণ করা হয় নাই এমন কোন তামাকজাত দ্রব্যের প্যাকেট বা মোড়ক কোন ব্যক্তি ক্রয় বা বিক্রয় করিতে পারিবে না।

(৩) কোন ব্যক্তি উপ-ধারা (১) বা (২) এর বিধান লঙ্ঘন করিলে তিনি অনূর্ধ্ব তিনমাস বিনাশ্রম কারাদণ্ড বা অনধিক এক হাজার টাকা অর্থ দণ্ড অথবা উভয় দণ্ডে দণ্ডনীয় হইবেন।

১১। (১) তামাকজাত দ্রব্য আমদানির সময় সংশ্লিষ্ট আমদানিকারক উক্ত আমদানিতব্য দ্রব্যে ব্যবহৃত প্রতিটি উপাদানের পরিমাণ উল্লেখ করিয়া সরকারের নিকট প্রতিবেদন দাখিল করিবেন।

(২) উপ-ধারা (১) এর অধীন প্রতিবেদন দাখিল না করিয়া কোন ব্যক্তি তামাকজাত দ্রব্য আমদানি করিলে যে কোন সময় উক্তরূপ দ্রব্য বাজেয়াপ্ত করা যাইবে।

১২। (১) তামাক চাষীকে তামাকজাত দ্রব্য উৎপাদনে নিরুৎসাহ এবং বিকল্প অর্থকরী ফসল উৎপাদনে উৎসাহ প্রদানের জন্য সরকার সহজ শর্তে ঋণ প্রদান করিবে, এইরূপ সুবিধা এই আইন কার্যকর হইবার পরবর্তী পাঁচ (৫) বৎসর পর্যন্ত অব্যাহত থাকিবে।

(২) তামাকজাত দ্রব্য উৎপাদন ও ব্যবহার ক্রমাগত নিরুৎসাহিত করিবার জন্য উদ্বুদ্ধকরণ এবং তামাকজাত সামগ্রীর শিল্প স্থাপনে নিরুৎসাহিত করিবার লক্ষ্যে সরকার প্রয়োজনীয় নীতিমালা প্রণয়ন করিবে।

১৩। কর্তৃত্বপ্রাপ্ত কর্মকর্তা এই আইনের অধীন দায়িত্ব পালনকালে The Penal Code, 1860 (Act XLV of 1860) এর section 21 এ যে অর্থে জনসেবক (Public Servant) কথাটি ব্যবহৃত হইয়াছে সেই অর্থে জনসেবক (Public Servant) বলিয়া গণ্য হইবেন।

প্যাকেটের গায়ে স্বাস্থ্য সম্পর্কিত সতর্কবাণী ইত্যাদি

তামাকজাত দ্রব্য আমদানির ক্ষেত্রে উপাদান সম্পর্কিত তথ্য প্রদান

তামাকজাত দ্রব্যের বিকল্প ফসল উৎপাদনের জন্য ঋণ প্রদান

জনসেবক

অপরাধ বিচারার্থ গ্রহণ
এবং জামিনযোগ্য

১৪। (১) The Code of Criminal Procedure, 1898 (Act V of 1898) এ যাহা কিছুই থাকুক না কেন, এই আইনের অধীন সকল অপরাধ-

(ক) আমলযোগ্য (Cognizable) এবং জামিনযোগ্য (Bailable) হইবে;

(খ) যে কোন শ্রেণীর ম্যাজিস্ট্রেট কর্তৃক বিচারযোগ্য হইবে।

(২) কর্তৃত্বপ্রাপ্ত কর্মকর্তার লিখিত অভিযোগ ব্যতিরেকে কোন আদালত এই আইনের অধীন কোন অপরাধ বিচারের জন্য গ্রহণ করিবে না।

কোম্পানী কর্তৃক
অপরাধ সংঘটন

১৫। এই আইনের অধীন কোন অপরাধ সংঘটনকারী ব্যক্তি যদি কোম্পানী হয়, তাহা হইলে উক্ত কোম্পানীর মালিক, পরিচালক, ম্যানেজার, সচিব বা অন্য কোন কর্মকর্তা বা এজেন্ট উক্তরূপ অপরাধ সংঘটন করিয়াছেন বলিয়া গণ্য হইবে, যদি না তিনি প্রমাণ করিতে পারেন যে, উক্ত অপরাধ তাহার অজ্ঞাতসারে হইয়াছে অথবা উক্ত অপরাধ রোধ করিবার জন্য তিনি যথাসাধ্য চেষ্টা করিয়াছেন।

ব্যাখ্যা।- এই ধারায়-

(ক) ‘কোম্পানী’ বলিতে কোন সংবিধিবদ্ধ সংস্থা, বাণিজ্যিক প্রতিষ্ঠান, অংশীদারী কারবার, সমিতি বা সংগঠনকেও বুঝাইবে;

(খ) বাণিজ্যিক প্রতিষ্ঠানের ক্ষেত্রে ‘পরিচালক’ বলিতে কোন অংশীদার বা পরিচালনা বোর্ডের সদস্যকেও বুঝাইবে।

বিধি প্রণয়নের ক্ষমতা

১৬। সরকার, সরকারী গেজেটে প্রজ্ঞাপন দ্বারা, এই আইনের উদ্দেশ্য পূরণকল্পে বিধি প্রণয়ন করিতে পারিবে।

মূল পাঠ এবং
ইংরেজীতে পাঠ

১৭। এই আইনের মূল পাঠ বাংলাতে হইবে এবং ইংরেজীতে অনুদিত উহার একটি নির্ভরযোগ্য পাঠ (Authentic English text) থাকিবে:

তবে শর্ত থাকে যে, বাংলা ও ইংরেজী পাঠের মধ্যে বিরোধের ক্ষেত্রে বাংলা পাঠ প্রাধান্য পাইবে।

রহিতকরণ ও
হেফাজত

১৮। (১) এই আইন বলবৎ হইবার সংগে সংগে-

(ক) The East Bengal Prohibition of Smoking in Show Houses Act, 1952 (E.B. Act XIII of 1952); এবং

(খ) তামাকজাত সামগ্রী বিপণন (নিয়ন্ত্রণ) আইন, ১৯৮৮ (১৯৮৮ সনের ৪৫ নং আইন) রহিত হইবে।

(২) উক্তরূপ রহিত হওয়া সত্ত্বেও, রহিত আইনসমূহের অধীন কোন মামলা বিচারাধীন থাকিলে বা অন্য কোন কার্যধারা চলমান থাকিলে উহা এমনভাবে অব্যাহত থাকিবে যেন এই আইন প্রণীত হয় নাই।

Copyright @ Ministry of Law, Justice and Parliamentary Affairs, Bangladesh.